



Shash Petapan

Shash Petapan tipatshimun no.5 Shetan-pishim(u) 2023

ESHI-TIPATSHIMUNANIT ANITE MAMUITUN PETAPAN :

4 nissi-pishim(u) katshishtauakanit anitshenat innu-utshimauat, e nishtiki innu-assia ute Mamuitun Petapan ka teuati, pushipanat nete Utaua tshetshi natshishkuaht tshishe-utshimaua ka pimutaniti innua utaimunnu, Marc Miller, mak uishamanipanit katipatshimu-mashinaitsheshiht ui patshitinakanipan aimun mak tshetshi kukuetshimuht. Ne ut natshishkatunanit, tshetshi uitaminiti shiaputuepanit ka nishtutatuht mak tshetshi tepuatanit Uepishtukueiau tshishe-utshimatash, tshetshi ishpienitahk ka uitahk tshe pushipanit tshetshi uipat tshishtapanit atusseun Nishtutatun.

[Ui tshitapatameku ka uishamakanihit Katipatshimu-mashinaitsheshiht](#)

Katshi ueshapaniti nishu taturanastakana, miam 18 nissi-pishim(u) ka tshishtauakanit, minuenitamupanat innu-utshimauat kaminaniht aimunnu ne e uitakanit atusseun nishtutatun nenua ukaiatusseshima kanatapishtatsheshiht, miam nishutshishikua mamuitupanit nete Uepishtukueiat.

Uitshikuat ashit tshetshi pashkapataht e mishtashpienitakuanit atusseun Nishtutatun mak uitamupanit mamuk tshe shaputuepaniht tshetshi tshishtapanitahk utatusseunnuau. Mamuk, uineuat ukaiatusseshimaua tshe tshitshipanit ne ka uitakanit atusseun etananit, tshika uauitamuanuat innuat, anite e nishtiki innu-assia, tshetshi nishtutakanit ne tshe ishi-katshitinahk kie ma tshe ishi-uanitahk mak tshika uauitakannu tshekuan anite mashinataikanit anite atusseun Nishtutatun.

Uepishtikueiat

Eshk(u) tepatshimunan neme nissi-pishim(u), mamuitupanit innu-utshimauat mak pitau-innu-utshimauat neni e nishtiki innu-assia, itutepanat nete ka mamuitunanit tshishe-utshimautshuapit Uepishtikueiat (assemblée nationale) natuenitamupanit tshetshi tshishtapanit ka natapishtatunanit atusseun Nishtutatun.

Shash Petapan

Shash Petapan tipatshimun no.5 Shetan-pishimu 2023

LES DERNIÈRES NOUVELLES DU REGROUPEMENT PETAPAN

Eshk(u) eka apita-tshishikanit, ka mamuituht innu utshimauat mak nenua ka uitshekuht, papeikua natshishkuepanit nenua ka pimutaniti aimunnu, nishtina nenei mamuituna, itatusseuat anitshenat, nakatuenitamuat tshetshi nashatakanit tipenitamunna etashteniti mak kuashk tshetshi ishi-pimutenanit anite miamuitunaniti : André Albert Morin, ka tipenitamua ushkatmamuitunnu, ka tshishpeuataniht auenitshenat, ka pimutauat utaimunnu innua mak kaiassimeua (PLQ), Gabriel Nadeau Dubois, ka tipenitamua pitau-mamuitun, tshishpeuataniht auenitshenat, mak Manon Massé, ka pimushtat aimunnu, pitau-mamuitun ka tshishpeuataniht auenitshenat, anite innua mak kaiassimeua (QS), ashit ne Paul St-Pierre Plamondon, kutakannu mamuitunnu ka tipenitamua mak ka pimutaua utaimunnu innua mak kaiassimeua (PQ).

Minuat, katshi apita-tshishikanit, kassinu anitshenat tshishe-utshimatash kupanieshat (députés) ka tipenitahk mamuituna, ka teht nete ka mamuitunanit tshishe-utshimautshuapit Uepishtikueiat, mitshetipaniht niashatuht mak tiapuetakau atusseunnu, ka natuenitamuan tshishe-utshimatash Uepishtukueiau « tshetshi shaputuepanit ka natapishtatunan, mak uipat tshetshi tshishtapanit ».

Pour lire la motion adoptée : [ICI](#)

Ishkanitshishikua katshi mishta-atussenanit, innu-utshimau Dufour patshitinamupan aimunnu : « nipushukatanan tshishe-utshimatash kupanieshat (députés) ka teht anite ka mamuitunanit tshishe-utshimautshuapit Uepishtikueiat, ka mamuituht tshetshi tapuetakanit atusseunnu ka natashtaiakh. Niuatamuanan ne Uepishtukueiau tshishe-utshimatash tshe pushipaniht, eukuannu nitashuapimatan. Niminuenitenan ka maniteuiahk ute ka mamuitunanit tshishe-utshimautshuapit Ueshpishtukueiat mak kaut umue takushiniaku, tshima uitamahk tshe tshishtapanit Nishtutatun, apu nikut animiuiati ».

Ka mamuitunan utshimauat, eshakumipipuna ka tutakanua (AGA) anitshenat Mamuitun Petapan ka tutahk, naume 4 Shetan-pishim(u) 2023 ka tshishtauakanit, anitshenat ka tshimaniht, uinepanit innu-utshimaua Gilbert Dominique tshetshi tipenitamuniti ka natapishtatunanit, assi uiatakaniti mak takuaikan innu tshishe-utshimatash. Niminuenitamuanan innu-utshimau Dominique, katshi tshimananit mak ninashkumanan innu-utshimau Dufour ka minutat atushkannu ka tshitatahk umuennu nishupipuna ka tat!

Shash Petapan

Shash Petapan tipatshimun no.5 Shetan-pishimu 2023

KATSHITSHIPANITAKAN ATUSSEUN UA UAUITAMAKAUIEK MAK TSHETSHI KUKUETSHIMUIEK

Naume 26 uapikun-pishimu ka tshishtauakan, eukuan tshitshipanipan atusseun uiauitakan mak ua kukuetshimunan anite innu-assia. Ne apashtakanipanit atusseu-katshitapatakanit, tshetshi mitshetkatshitinanit auenitshenat.

Eukuan ne uiesh nishunueshipan auenitshenat miamuituht anite mashinaikanitshuapit Nutashkuan ashit innu-utshimaua Tettaut mak peiku pitau-innu-utshimaua.

Nete Essipit, 37 itashipanit netutuaht innu-utshimaua Dufour mianiku aimunnu eshku ka tshitshipananit ka patshitinakan aimun mak tanite etananit ne ka natshishkatunanit.

Nete uin Mashteuiatsh, neunnueshipan uiesh miamuituht. Innu-utshimau Dominique uitamuepan etananit ka natapishtatunanit, tshe aitanan mak ka itatussenan. Minuat, anitshenat ka teht mashinaikanitshuapit, ekue pushupanihiht nete ka tapishinini atusseu-katshitapatakanit tshetshi mamuk natutuaht, ne ka patshitinahk aimunnu, ka tipenitak ka natapishtatunanit. Uauitamupanit tshetshi minu-nishtuatakanit mak tshetshi uatakanit ipatahk kie uauitamupanit tshekuannu tekuanit anite Nishtutatun. Minu-patshitinamupan aimunnu tshetshi minu-uatamuniti innua ne eshinakuak atusseun Nishtutatun.

Mamuk uiesh 200 itashikupanit etaht ka itatussenan! Ni nashkumanan anitshenat ka teht, apatan tshetshi nishtutakanit ne atusseun Nishtutatun!

Ka patshitinakanit aimun, shash nukutakannu anite atusseu-katshitapatakanit!

Anitshenat shash ka uinishuht, ka patshitinakanit aimun, ui kau natutameku!

1. Ne tshe tshissepitaman kie ma ui ituteni ne etashtet : <https://www.icastpro.ca/ud3gxf>
2. Mashinatei tanite tshe itishaimakauin tapishinini atusseu-katshitapatakanit
3. Mashinatei tshitatshituashunin ka minakauin
4. Ui apashtani kutak atshituashun, mashinatai tanite tshe itishaimakauin tapishinini atusseu-katshitapatakanit anite ka takuanua « **Si vous n'avez pas de code d'accès** » : tshe itaishaimakauin kutak atshituashun anite tapishinini atusseu-katshitapatakanit.

Anitshenat eka ka uinishuht :

1. Mashinatauishu ui netuenitamani tshetshi itashaimakauin :
<https://forms.office.com/r/GZNQfiMv8U>

****tshi uitamatinan ne ka patshitinakanit aimun, muk tshin an tshetshi natutaman. Apu tapuetakanit tshetshi ashupanitakanit, kie tshetshi itashaiman nete aiat, kie tshetshi minatau kutakat auenitshenat. Mak tshetshi mishituenipanitan aiapishish kie ma kassinu ka iakunakanit****

Shash Petapan

Shash Petapan tipatshimun no.5 Shetan-pishimu 2023

TSHE ITATUSSENAN MINAT : TSHIKA NATAKANUAT INNUAT NETE UTASSIUAU

Umue minuat tatupishimua, nuishamanan innuat tshetshi minu-natau-tshissenitahk, mamitunenitahk mak tshetshi uauitamatuht ne atusseun Nishtutatun, peikuan tshetshi uitahk, tan tshe itatussenanit ne, eka minupuaniti atusseun Nishtutatun. Mitshet tshika itatussenanu tshetshi mishituenipanitakanit, kassinu auen tshetshi petahk.

NIPIKI 2023 NASHT ESPEH SHIKUAKI 2024

- Natshishkatunanu tan tshe ishi-patshitinakanit tipatshimun, mamuitunanu anite atusseu-katshitapatakanit, mamuitunanu tshetshi minu-uauitamakauek tshakuan anite meshinataikanit Nishtutatun, papeik innu-assia uinuau utassiuau tshika mamuituht, tshika uishamakaunauht tshetshi shatshuatimek mashinaikantshuap etatussenanit : nashatamuk anite facebook mak anite atusseu-katshitapatakanit (sites Web) uiatakanit tshitinnu-assiuau kie ma Mamuitun Petapan (Regroupement Petapan). Tshika minukaunau tan eshpesh tshe tutakanit, tanite tshe tutakanit mak tan tshe ishi-nakutakanit.
- Unuipanitakanu mashinaikaniss uiatakaniti iapataki aimuna ne atusseun Nishtutatun (15 tatuekan mashinaikaniss).
- Unuipanianuat ka takuashiti ka iakunitshenanit kie kaimu-mishtikut tshika uauitakanu atusseun Nishtutatun.
- Unuipanitakanu mashinaikan uiatakaniti passet iapataki aimuna ne atusseun nishtutatun (20-30 tatuekan).
- Innuat anitshenat 3 innu-assia ka mashinatautishuht, aieshkauashtenu mashinaikannu tshetshi tshitatakau, kassinu mashinataikanu atusseun Nishtutatun (nuash 300 tatuekan mashinaikan).
- Unuipanitakanu aimun anite facebook, atusseu-katshitapatakanit (site web) mak kutaka.



TSHE ITATUSSENAN MINAT : TSHIKA NATAKANUAT INNUAT NETE UTASSIUAU

NIPIKI 2023 NASHT ESPESH SHIKUAKI 2024 (SUITE)

- Pepemau tshika itatussenanu tshetshi uauitakaniti aimuna iapashtakaniti atusseun Nishtutatun miam: Ne tshe itatusseht, tshe aitiht, tshe ishi-uinakanit auen, tshe mamuituht kie kutaka, tshe aitanan atushmanit. Ne tshe uauitakaniti aimuna essishuemakaki, ne tshe ishi-mashinataikan miam anite ka uaeshtakanit tshetshi itashteti mak tshe ishi-mishkutshipanit, ne tshe ishi-nakatuenitakan mak tshe ishi-nukutakan nutem eshinakuanit innu utinniu, innu-aitun, innu-aimun, ka natuapassenan, eshinikateti natau-assia, kie kutak tshekuan , ne tshe ishi-takuaimatshet innu tshishe-utshimatash, assia mak tshe itapashtat, tshe kukuetshimakauiek, ne tshe ishi- takuaimatakan shunia, tan tshe ishi-nakutakanit tshitshipaniti Nishtutatun.
- Kassinu anite tshika patshitinakanu aimun kie ui kukuetshimutau anitshenat ka tipatshimu-mashinaitsheshiht kie nete tshikaimu-mishtukumuau tshitassia.

NIPIKI 2024

- Kaut tshika uitakanu neme ka patshitinakanit aimun mak ka uauitakanit nete innu-assia

TAKUATSHIKI 2024

- Tshika utinam aimunnu nekaussei tshetshi ma tapuetamukue kie ma mauat, ne tshetshi mashinataikanit tiapuemakaht* etashtet ne Nishtutatun anitshenat kanatapishtasheshiht tshe uinishuht.

*Mashinataikanit tiapuemakash issishuemakan ne mashinatautishutau kanatapishtatsheshiht anite papeik e tatuekanit mashinaikanu, eukuan uiatakanit tiapuemakanit mak tshetshi eka mishkutinakanit etashtenit. Mashinataikaniti tiapuemakash eukuan tshiatipanit tshetshi mashinatauishuht innuat e nishtiki innu-assia, tshika tshitshipanitakanu a kie ma mauat ne Nishtutatun.



UI NATUENITAMEKU MASHINAIKAN ATUSSEUN NISHTUTATUN

Katshimanakaniht Essipit, Mashteuiatsh mak Nutashkuanit pukushuenitamuaht tshetshi tshitatakanit anite innit mashinaikan atusseun Nishtutatun. Muk, nitashuapimanan tshishe-utshimatash Ueshpishtukueiau tshetshi tshiuenimakauiahk, eshku nete passet apu nishtutatunanit kie apu tshi mamshuetakanit kassinu ne eshi-mashinataikanit, tshika minakaunau tshetshi tshitatemek nete nipiki. Shaputuet aiekauashteti tshika itasheimakaunau anite atusseu-katshitapatakanit anitshenat ka natuenitahk. Uipat tshika uitamakaunau.

Ui natuenitameku mashinaikan atusseun Nishtutatun :

1. Tshe shatshuatemek anite uiatakanit atusseu-katshitapatakanit mamuitun Petapan (regroupement Petapan) : <https://petapan.ca/>
2. Tshe tshissipitaman **Demande du texte de projet de Traité** anite ishipimit, tshiminunit takuan
3. Tshe mashinataishun, tshe tshissipitaman **Envoyer**
4. 1. Aieshkushteti mashinaikan, anitshenat info@petapan.ca tshika itashaimakuau tshekuannu tshetshi tapishiniek anite atusseu-katshitapatakanit. Ne tshika itapatan tshetshi tshitatemek etashtet atusseu Nishtutatun.

MAMUITUN PETAPAN TSHIUENAM KA KUKUETSHITSEHEMIEK:

***Ka kuetshitshemunan
umue pishim^u :***

**TSHIKA UANITANAN A ESHI-
NISHTUAPIMIKAUIAHK
MIAM INNU?**

Mauat! Anu tshika katshitinenau anitshenat ka mashinatauanuatihit anite Nishtutatun, Innit ka teuati, eshku tshika ishi-uinuanat miam innuat eshi-nishtuapimaniht, tshitshipaniti Nishtutatun, peikuan anitshenat eka ka iapuat iinu-assi. Iat shuk minitishutauht innuat tshetshi tshitapimitishuht, tshika nishtuapimuanat miam innu, miam ne kaitashteua mashinaikanit la Loi sur les Indiens kie eshku tshika katshitinamuaht eshi-uitshiakaniht auenitshenat miam utshishennu-shuniamuaua, natukuna, katshishkutamatunanit, mitshuapa, kie kutaka. Kassinu nenei eshi-uitshian auen innu kie anite mishtukushit Canada eshku tshika katshitinamuaht tshitshipaniti Nishtutatun.